

ADYAYA I

PURWAKA

1.1 Dadalan Pikobet

Basa dahat mautama ring sekancan wawidangan krama Baline. Mawinan Basa punika sane kaanggen mabebaosan ring sadina-dina. Ri tatkala mabebaosan sareng semeton Bali, pastika sampun iraga sareng sami patut nganggen basa Bali. Santukan basa Bali punika pinaka ceciren (*identitas*) iraga dados jadma Bali. Antuk ngamargiang swadarma iraga dados jadma, jadmane tuah madue piranti inggih punika basa. Yening indayang ring jagate nenten wenten basa sinah para jadmane pacang ngrasa sungsut lan meweh ri kala pacang mabebaosan majeng ring anak sane lianan. Duaning nganggen basa, jadmane prasida ngamedalang sekancan sane wenten ring pikayunan ipun. Punika mawinan basa Baline patut kalestariang mangda ring aab sekadi mangkin basa Bali iragane nenten rered. Basa Bali punika basa sane kapiara becik olih krama Baline, basa Baline taler kabaos basa ibu, kebaos basa ibu santukan basa Baline sampun kaanggen olih krama Baline ngawit wawu embas sane pinaka serana mabebaosan ring sajeroning pakaryan krama baline. Krama Bali nyantos mangkin sampun mautsaha ngupapira tur nglimbakang basa Baline mangda nenten rered ring aab sekadi mangkin.

Basa Baline kadadosang peplajahan *muatan lokal wajib* sane patut kaajahin ring sakancan undagan paguron-guron sawewengkon Provinsi Bali. sakadi sane sampun kalaksanayang ring sekolah peplajahan basa Bali kadagingin kalih jam peplajahan. Kawentenan puniki kadasarin antuk tetimbangan saking pamerintah Provinsi Bali antuk ngamedalang *Peraturan Gubernur Bali Nomor 20 Tahun 2013*

indik *Bahasa, Aksara dan Sastra Daerah Bali pada Pendidikan Dasar dan Menengah*. Silih sinunggil daging Pergub Bali punika maosang mangda basa Bali kaajahin pinaka peplajahan ring makasamian undagan paguron-guron inggih punika ring undagan paguron-guron *dasar miwah menengah* antuk galah pinih kidik kalih jam peplajahan. Indike punika peplajahan basa Bali sane ngamolihang galah pinih kidik kalih jam peplajahan karasayang cukup. Mawinan galah sane kalih jam peplajahan punika guru prasida dangan ri kala nlatarang materi-materi peplajahan basa Bali sane akeh minakadi, materi anggah-ungguh basa Bali, pasang aksara Bali, kasusastraan Bali miwah sane lianan.

Kacingak mangkin ring lapangan, sane ngamolihang galah kalih jam peplajahan punika karasayang kirang. Mawinan guru ngrasayang meweh ri kala nlatarang materi-materi basa Bali. Punika mawinan guru meweh antuk ngamargiang utawi nincapang peplajahan basa Bali mangda paripurna, mawinan nenten samian peplajahan prasida karesepang olih sisia. Punika mawinan kawagedan sisia mabasa Bali kantun kirang. Saking pikobet sane kapanggih ring *Peraturan Gubernur Bali Nomor 20 Tahun 2013* sane sampun kamedalang, pemerintah sayan urati majeng ring kawentenan basa Baline mangda nenten rered. Pinaka usaha nglimbakang basa Baline mangkin sampun kauratiang olih Gubernur Bali bapak I Wayan Koster sane sampun ngamedalang *Peraturan Gubernur* sane pinih anyar warsa 2018 inggih punika *Peraturan Gubernur (Pergub) Bali No 80 Tahun 2018* indik *Pelindungan dan Penggunaan Bahasa, Aksara dan Sastra Bali serta Penyelenggaraan Bulan Bahasa Bali*. Manut bapak I Wayan Koster, ngamedalang Peraturan Gubernur Bali punika madasar antuk *realitas* sane sayan kirangnyane krama Bali antuk nganggen bahasa, aksara lan sastra Bali ring wewidangan krama Baline. Manut bapak I Wayan Koster kawentenan budaya Bali punika sane sayan rered mawinan saking iusan *modernisasi*,

kemajuan teknologi lan globalisasi, taler kirangnyane rasa percaya diri krama Bali antuk nganggen basa lan sastra Bali. Punika mawinan generasi milenial sekadi mangkin sayan nenten urati majeng ring bahasa Bali. Saking Peraturan Gubernur Bali punika Wayan Koster ngaptiang mangda prasida ngukuhang bahasa, aksara lan sastra Bali, sane dados identitas krama Bali. Kawentenan punika sampun manut sareng visi lan misi Gubernur Bali Wayan Koster inggih punika “Nangun Sat Kerthi Loka Bali” sane madue arti menjaga kesucian dan keharmonisan alam Bali beserta isinya, mewujudkan kehidupan krama Bali dan gumi Bali yang sejahtera dan bahagia.

Ring Peraturan Gubernur Bali punika wenten 11 adyaya silih tunggilnyane ngenenin indik ngrajegang bahasa, aksara lan sastra Bali, nganggen bahasa Bali, nganggen aksara Bali lan ngawentenang bulan basa Bali nyabran warsa ring bulan februari. Panyanggra krama ngenenin indik Peraturan Gubernur Bali utamanyane indik nganggen aksara Bali sampun kamargiang, santukan mangkin sampun samian *penulisan papan nama* sane nganggen aksara Bali. Minakadi *penulisan papan nama jalan, penulisan papan nama sekolah-sekolah, penulisan papan nama kantor-kantor miwah instansi-instansi* sane lianan. Tiosan ring punika, Panyanggra krama ngenenin indik ngamargiang Bulan Bahasa Bali sampun kamargiang, santukan sampun samian Desa Adat sane ngamargiang Bulan Bahasa Bali sane kalaksanayang nyabran bulan februari, Bulan Bahasa Bali punika ngawentenang minakadi pacentokan nyurat lontar, *masatua bali, mapidarta, darmawacana miwah* sane lianan.

Ngenenin indik nganggen (*penggunaan*) Bahasa Bali mangkin sampun akeh krama sane sampun ngamargiang utawi nganggen basa Bali sane kalaksanayang ring rahina wraspati. Krama sampun makinkin ngamargiang *peraturan* antuk mabasa Bali. Mabasa Bali kamargiang olih pegawai, guru, *tenaga kependidikan, peserta didik* lan krama sane wenten ring wewidangan *lembaga pemerintahan lan lembaga swasta* sane

kalaksanayang nyabran rahina wraspati. Kacingkak mangkin ring *lembaga pendidikan*, ngawit saking TK nyantos *perguruan tinggi* taler sampun ngamargiang peraturan indik mabasa Bali. Saking peraturan Gubernur Bali punika, panilik meled nilikin sakadi panyanggra sekolah-sekolah sane wenten ring Bali silih tunggilnyane ring sekolah SMA Negeri 2 Singaraja utamanyane ngenenin indik mabasa Bali nyabran rahina wraspati. Sekolah SMA Negeri 2 Singaraja miwah guru-guru sane *kompeten* miwah *kreatif* dahat *mendukung* ngenenin indik Peraturan Gubernur sane sampun kamedalang olih bapak I Wayan Koster. Ring sekolah SMA Negeri 2 Singaraja kawagedan para sisianyane kabaosang kantun kirang antuk mabasa Bali. Punika mawinan SMA Negeri 2 Singaraja madue tata cara panyanggra sane malianan utawi sane *kreatif* sareng sekolah-sekolah sane lianan. Tata cara panyanggra sekolah SMA Negeri 2 Singaraja minakadi ngawentenang literasi sekolah sane marupa literasi mabasa Bali.

Literasi inggih punika kawagedan ngarereh, ngaresepang miwah nganggen *sesuatu secara cerdas melalui berbagai aktivitas*, minakadi ngawacen (*membaca*), miarsayang (*menyimak*), nyurat (*menulis*) miwah mabebaosan (*berbicara*) (Kemendikbud, 2016:2). Literasi sekolah inggih punika silih tunggil usaha sane *bersifat partisipatif* nyarengang sane wenten ring sekolah minakadi sisia, guru, kepala sekolah lan tenaga kependidikan. Kawentenan literasi sekolah puniki kalaksanayang matetujon mangda kawagedan sisia melajah sayan nincap. Manut sadu wicara sane sampun kalaksanayang majeng ring guru basa Bali kelas XI MIPA, I Gede Herry Mahendrawan, S.Pd.B maosang yening ring sekolah SMA Negeri 2 Singaraja literasi punika kalaksanayang ring galah 07.00 – 07.30 WITA, literasi sane awuku kalaksanayang kaping tiga inggih punika nyabran rahina anggara, buda miwah wraspati. Ring rahina anggara literasi sane kalaksanayang inggih punika nganggen

bahasa Indonesia, yening ring rahina buda literasi sane kalaksanayang inggih punika nganggen *bahasa Inggris*, sane kaping untat kalaksanayang ring rahina wraspati literasi sane kalaksanayang inggih punika nganggen basa Bali. Literasi mabasa Bali kalaksanayang olih *perwakilan* kelas soang-soang saking kelas X nyantos kelas XII, literasi punika kalaksanayang magilir sane awuku kalaksanayang olih siki *perwakilan* kelas, salanturnyane kalaksanayang awuku sane jagi rauh. Sadurung literasi mabasa Bali punika kalaksanayang makasami sisia saking kelas X, XI lan XII kapupulang ring lapangan lan kasarengin olih guru-guru ring SMA Negeri 2 Singaraja, nglantur kalaksanayang puja tri sandya lan ngendingang *lagu Indonesia Raya*. Literasi mabasa Bali punika kalaksanayang minakadi para sisia *perwakilan* kelas kaarep nelatarang *materi bebas*, nanging patut nganggen basa Bali. Wusan punika kalanturang antuk pabligbagan ngenenin indik materi sane sampun katlatarang.

Panyanggra sekolah SMA Negeri 2 Singaraja ngenenin indik Peraturan Gubernur Bali no.80 tahun 2018 sampun kebaosang becik santukan sampun *kreatif* antuk ngawentenang literasi mabasa Bali pinaka usaha sane ngawinang kawagedan para sisia mabasa Bali sayan nincap. Manut sekadi sane sampun katlatarang ring ajeng, punika sampun nyihnayang yening krama Baline sampun *mendukung* utawi ngukuhang bahasa, aksara lan sastra Baline. Sane ngawinang panilik nilikin literasi mabasa Bali ring SMA Negeri 2 Singaraja, santukan arang sekolah-sekolah sane ngamargiang literasi napi malih literasi mabasa Bali sakadi ring SMA Negeri 2 Singaraja sane sampun ngamargiang literasi mabasa Bali pinaka usaha nglimbakang basa Baline.

Tetilik asoroh sane muat indik literasi mabasa Bali sampun naenin kalaksanayang sadurungnyane. Sekadi tetilikan saking Nida Helwa Hanin sane mamurda “*Pelaksanaan Gerakan Literasi Sekolah Dalam Pembentukan Karakter*

Siswa di SDN Madyopuro 2 Malang". Tetilikan puniki kalaksanayang pinaka usaha prasida ngareseping pamargin literasi sekolah sane kamargiang miwah prasida ngareseping karakter sane wenten ring sisia ri kala pamargin literasi sekolah punika.

Tetilik asoroh sane kaping kalih inggih punika saking Nurasih Hasanah sane mamurda "*Program Literasi Sekolah Dalam Meningkatkan Kedisiplinan Siswa SMA Negeri 8 Yogyakarta*". Tetilik puniki kalaksanayang pinaka usaha nguningin miwah prasida ngareseping soroh-soroh literasi sekolah ri kala nincapang kedisiplinan sisia kelas X miwah XI SMA Negeri 8 Yogyakarta.

Tetilik asoroh sane kaping tiga inggih punika saking Kadek Agus Darmayasa sane mamurda "*Panyanggra Krama Kecamatan Tejakula, Kabupaten Buleleng ring Kawentenan Pergub Bali No. 80 Tahun 2018 Utamane Indik Papan Nama Maaksara Bali*". Tetilik puniki kalaksanayang pinaka usaha nguningin sapunapi panyanggra krama tejakula indik pergub Bali miwah nguningin kaiwangan-kaiwangan sasuratan papan nama maaksara Bali.

Pabinayan tetilikan ring ajeng sareng tetilikan puniki inggih punika durung wenten sane nilikin indik Peraturan Gubernur Bali No. 80 Tahun 2018, inggian punika mabasa Bali nyabran rahina wraspati sane kalaksanayang marupa literasi mabasa Bali. Punika mawinan panilik meled pacang nilikin indik literasi mabasa Bali sane kalaksanayang ring SMA Negeri 2 Singaraja. Tetujon panilik nilikin indik literasi mabasa Bali punika mangda nguningin sapunapi pikolih saking literasi mabasa Bali inucap mapaiketan sareng peplajahan basa Bali ring sisia kelas XI MIPA 1 SMA Negeri 2 Singaraja. Manut napi sane katlatarang ring ajeng, panilik ngalaksanayang tetilik sane mamurda "*Kawentenan Literasi Mabasa Bali ring SMA Negeri 2 Singaraja*".

1.2 Ngrereh Pikobet

Sajeroning tetilikan puniki, panilik ngrereh makudang-kudang pikobet sane mapaiketan sareng dadalan pikobet sane sampun katlatarang ring ajeng. Pikobet sane sampun karereh mangda mapaiketan sareng saking literasi mabasa Bali sane sampun kalaksanayang olih sekolah. Pikobet sane sampun karereh minakadi, (1) Sapunapi wangun literasi mabasa Bali sane kamargiang ring SMA Negeri 2 Singaraja? (2) Sapunapi panampen sisia kelas XI MIPA 1 SMA Negeri 2 Singaraja ngenenin indik literasi mabasa Bali sane sampun kamargiang? (3) Sapunapi pikolih sajeroning literasi mabasa Bali inucap mapaiketan sareng peplajahan basa Bali ring kelas XI MIPA 1 SMA Negeri 2 Singaraja? (4) Sapunapi kawagedan sisia kelas XI MIPA 1 SMA Negeri 2 Singaraja mabasa Bali?.

1.3 Ngwatesin pikobet

Sajeroning ngrereh pikobet sane sampun katlatarang ring ajeng, panilik ngwatesin pikobet sane katilikin inggih punika sapunapi pikolih sajeroning literasi mabasa Bali sane sampun kamargiang olih sekolah, taler katilikin wantah ring kelas XI MIPA 1 SMA Negeri 2 Singaraja. Pikobet punika kawatesin santukan panilik kabanda antuk galah. Pikobet sane kawatesin inggih punika (1) Wangun literasi mabasa Bali sane kamargiang ring SMA Negeri 2 Singaraja, (2) Panampen sisia kelas XI MIPA 1 SMA Negeri 2 Singaraja ngenenin indik literasi mabasa Bali sane sampun kamargiang, (3) pikolih sajeroning literasi mabasa Bali inucap mapaiketan sareng peplajahan basa Bali ring sisia kelas XI MIPA 1 SMA Negeri 2 Singaraja?

1.4 Bantang Pikobet

Sajeroning tetilikan puniki malarapan antuk bantang pikobet ring ajeng, bantang pikobet saking tetilikan puniki inggih punika :

1. Sapunapi wangun literasi mabasa Bali sane kamargiang ring SMA Negeri 2 Singaraja?
2. Sapunapi pikolih sajeroning literasi mabasa Bali inucap mapaiketan sareng peplajahan basa Bali ring sisia kelas XI MIPA 1 SMA Negeri 2 Singaraja?

1.5 Tetujon Tetilik

Malarapan antuk bantang pikobet sane sampun katlatarang ring ajeng tetilikan puniki madue tetujon inggih punika:

1. Mangda prasida nelatarang wangun literasi mabasa Bali sane kamargiang ring SMA Negeri 2 Singaraja.
2. Mangda prasida nelatarang pikolih sajeroning literasi mabasa Bali inucap mapaiketan sareng peplajahan basa Bali ring sisia kelas XI MIPA 1 SMA Negeri 2 Singaraja.

1.6 Kawigunan Tetilik

Saking bantang pikobet lan tetujon tetilik sane sampun katelatarang wenten kawigunan sane prasida kapolihang saking tetilikan puniki minakadi:

1.6.1 Kawigunan Pamucuk

Kawigunan pamucuk saking pikolih tetilik puniki mangda prasida mawiguna ring sajeroning wewidangan paguron-guron, mapaiketan sareng usaha nglimbakang basa Baline.

1.6.2 Kawigunan Panglimbak

Siosan tekening kawigunan pamucuk sane sampun katelatarang ring ajeng pikolih tetilik puniki kaaptiang mawiguna majeng ring:

a. Majeng pangwacen

Tetilikan puniki kaaptiang mangda prasida ngicen pangweruh majeng ring para pangwacen indik mabasa Bali. Taler prasida ngwantu nglimbakang basa Baline mangda stata ajeg.

b. Majeng ring Sekolah

Pinaka sasuluh sane mawiguna majeng ring sekolah mawinan prasida nguningin sapunapi kawagedan sisia, kaiwangan-kaiwangan miwah pikobet-pikobet sane kapanggih olih sisia. Risampune uning, sekolah utawi guru prasida ngicen pamargi utawi panuntun ngenenin indik pikobet-pikobet sane kapanggih sisia.

c. Majeng ring Sisia

Tetilik puniki prasida kadadosang srana anggen ngwewehin kaweruhan sisia indik literasi mabasa Bali sane sampun kapolihang, prasida ngwantu sisia nyelehin pikobetnyane ritatkala mabasa Bali.

d. Majeng ring Panilik

Tetilik puniki prasida kaanggen *pengalaman langsung* ring sajeroning nguningin sapunapi pikolih saking literasi mabasa Bali sane sampun kamargiang olih sekolah.

e. Majeng ring panilik salanturnyane

Pikolih tetilik puniki prasida kaanggen mulat wali nglimbakang tetilikan sane asoroh utawi salanturnyane mangda sayan jangkep.